



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

PARLIMEN KEEMPAT BELAS
PENGAL KETIGA
MESYUARAT KETIGA

K A N D U N G A N

UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Rizab Biosfera Bukit Bendera**
- *YB. Tuan Wong Hon Wai (Bukit Bendera)* (Halaman 1)
- **Kementerian Kewangan Malaysia Perlu
Memperhalusi Keperluan Dana Khas
Bantuan Sewa (Rental Relief Fund) bagi
Melindungi Golongan B40/M40 serta
SME daripada Impak COVID-19**
- *YB. Tuan Charles Anthony Santiago (Klang)* (Halaman 3)

**MALAYSIA
KAMAR KHAS
PARLIMEN KEEMPAT BELAS
PENGKAL KETIGA
MESYUARAT KETIGA**

Rabu, 25 November 2020

Mesyuarat dimulakan pada pukul 12.00 tengah hari

DOA

*[Tuan Yang di-Pertua **mempengerusikan Mesyuarat**]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

Rizab Biosfera Bukit Bendera

12.04 tgh.

Tuan Wong Hon Wai [Bukit Bendera]: Terima kasih Tuan Yang di-Pertua. Pada kesempatan tengah hari ini, izinkan saya membangkitkan isu-isu yang berkaitan dengan status pengiktirafan Pertubuhan Pendidikan, Saintifik dan Kebudayaan Pertubuhan Bangsa-Bangsa Bersatu (UNESCO) di bawah Rizab Biosfera (*Biosphere Reserved*).

Rizab Biosfera ini akan melingkungi kawasan seluas 12,681 hektar di Bukit Bendera, Taman Laut dan Taman Negara Teluk Bahang. Permohonan Rizab Biosfera telah pun dilaksanakan oleh Perbadanan Bukit Bendera Pulau Pinang (PBBPP) dan PBBPP sudah menentukan zon teras, zon penampakan dan zon peralihan serta kawasan yang perlu dilestarikan.

Saya ingin memohon maklumat dan maklum balas berikut daripada Kementerian Tenaga dan Sumber Asli untuk perkara-perkara di bawah:

- (i) apakah status semasa kelulusan permohonan Rizab Biosfera Bukit Bendera untuk mendapatkan pengiktirafan Pertubuhan Pendidikan Saintifik dan Kebudayaan Pertubuhan Bangsa-Bangsa Bersatu?;
- (ii) mohon pihak kementerian menyatakan prosedur penuh seterusnya yang harus dilaksanakan untuk mendapat pengiktirafan UNESCO Rizab Biosfera;
- (iii) apakah usaha penambahbaikan Taman Negara Teluk Bahang dan peruntukan pada tahun 2020?; dan

- (iv) adakah pihak kementerian bercadang untuk melaksanakan kajian terhadap kawasan- kawasan lain yang berpotensi untuk dijadikan Rizab Biosfera UNESCO di Malaysia?

Saya memohon supaya Yang Berhormat Menteri dan pihak Kementerian Tenaga dan Sumber Asli dapat memberikan jawapan terhadap setiap satu persoalan yang dibangkitkan di atas. Sekian, terima kasih.

Tuan Yang di-Pertua: Terima kasih. Silakan Yang Berhormat Timbalan Menteri.

12.05 tgh.

Timbalan Menteri Tenaga dan Sumber Asli [Tuan Ali anak Biju]:

Terima kasih Tuan Yang di-Pertua, terima kasih Yang Berhormat Bukit Bendera. Tuan Yang di-Pertua, untuk makluman Ahli Yang Berhormat Bukit Bendera, pencalonan Bukit Bendera sebagai Tapak Rizab Biosfera Yang Ketiga Malaysia yang berkeluasan 12,481 hektar telah dikemukakan kepada Sekretariat *United Nations Educational, Scientific and Cultural Organization* (UNESCO) di Paris pada 29 September 2020 yang lalu.

Pencalonan tersebut akan melalui proses penilaian oleh panel *Advisory Committee for Biosphere Reserve*. Seterusnya, pencalonan ini akan dibentangkan di mesyuarat *Man and the Biosphere International Coordinating Council* (MAB ICC) untuk pertimbangan akhir. Secara amnya, proses ini akan mengambil masa selama setahun bagi penilaian di peringkat Sekretariat UNESCO di Paris.

Untuk yang kedua, semenjak Taman Negara Pulau Pinang diwartakan pada 10 April 2003 di bawah Akta Taman Negara 1980 (Akta 226) sehingga tahun 2020, sebanyak RM2.7 juta telah diperuntukkan di bawah Bajet Mengurus bagi menyelenggara fasiliti di Taman Negara Pulau Pinang. Bagi peruntukan pembangunan pula, sebanyak RM47.56 juta telah diperuntukkan bagi program pembangunan infrastruktur di bawah RMKe-8 sehingga RMKe-11. Kesemua peruntukan adalah melalui Kementerian Tenaga dan Sumber Asli (KeTSA).

KeTSA sebagai *focal point* MAB (*Man and the Biosphere*) sentiasa mengalu-alukan dan menyokong usaha mana-mana kerajaan negeri untuk mencalonkan mana-mana tapak baharu yang ingin dikemukakan kepada pihak UNESCO. Sekian, terima kasih.

**Kementerian Kewangan Malaysia Perlu Memperhalusi Keperluan
Dana Khas Bantuan Sewa (*Rental Relief Fund*) bagi Melindungi
Golongan B40/M40 Serta SME daripada Impak COVID-19**

12.08 tgh.

Tuan Charles Anthony Santiago [Klang]: Tuan Yang di-Pertua, Yang Berhormat Menteri. Dana Khas Bantuan Sewa ataupun *Rental Relief Fund* merupakan suatu inisiatif yang penting bagi menghadapi impak ekonomi Pandemik COVID-19. Kenyataan Yang Berhormat Menteri Pembangunan Usahawan dan Koperasi baru-baru ini menyatakan hampir 32,000 buah syarikat SME terpaksa '*gulung tikar*' akibat impak COVID-19. Kenyataan ini jelas menunjukkan syarikat-syarikat SME dan mikro SME memerlukan suatu dana khas bagi mengurangkan kos operasi serta menghadapi impak COVID-19.

Pandemik COVID-19 ini juga menyebabkan golongan B40 dan juga M40 terutama pekerja tidak formal dan peniaga persendirian seperti pemandu teksi dan bas juga terjejas dan mengalami kesusahan dalam menampung kos sewa rumah dan juga premis.

Sewa premis dianggarkan menelan kos lebih kurang 15 peratus hingga 20 peratus keseluruhan operasi perniagaan yang semestinya merupakan suatu beban kepada perniagaan. Kewujudan suatu Dana Khas Bantuan Sewa akan memberi tempoh masa bagi peniaga SME terutama mikro SME dan golongan B40 dan M40 pulih daripada impak COVID-19 serta mengurangkan risiko menjadi mufli.

Saya mohon kerjasama Yang Berhormat Menteri untuk menjawab soalan-soalan berikut bagi memahami pendekatan dan pendirian MOF dalam Dana Khas Bantuan Sewa ataupun *Rental Relief Fund*:

- (i) adakah kementerian bercadang untuk menubuhkan sebuah Dana Khas Bantuan Sewa (*Rental Relief Fund*) bagi membantu SME, mikro SME dan golongan B40 serta M40 bagi menghadapi impak COVID-19?;
- (ii) adakah kementerian akan menubuhkan sebuah jawatankuasa khas bagi menyelidik keperluan mewujudkan Dana Khas Bantuan Sewa serta pendekatan pemulihan SME dan mikro SME serta berkenaan keperluannya dan mekanisme dana tersebut?; dan
- (iii) adakah kerajaan akan menasihati semua kerajaan negeri dan PBT untuk memberi pengecualian atau

diskaun sewa premis perniagaan di bawah pentadbirannya?

Sekian, terima kasih atas kerjasama Tuan Yang di-Pertua dan juga Yang Berhormat Menteri.

Tuan Yang di-Pertua: Terima kasih Yang Berhormat Klang. Silakan Yang Berhormat Timbalan Menteri.

■1210

12.10 tgh.

Timbalan Menteri Kewangan II [Tuan Mohd Shahar bin Abdullah]: *Bismillahir Rahmanir Rahim. Assalamualaikum warahmatullahi wabarakatuh.* Tuan Yang di-Pertua dan Ahli Yang Berhormat, apa yang dibangkitkan oleh Yang Berhormat tadi adalah berkaitan tentang Dana Khas Bantuan Sewaan dengan izin, *Rental Relief Fund* dan Yang Berhormat bertanyakan bagaimana pendirian Kementerian Kewangan.

Untuk makluman Yang Berhormat, pada masa ini, Kementerian Kewangan tidak bercadang untuk menubuhkan sebuah Dana Khas Bantuan Sewaan. Sebaliknya, kerajaan hari ini telah mengambil pendekatan berlainan sedikit untuk membantu syarikat PKS berhubung dengan sewaan.

Pada bulan Ogos 2020, Dewan yang mulia ini telah meluluskan satu Rang Undang-undang Langkah Sementara Bagi Mengurangkan Kesan Penyakit Koronavirus 2019. Antara lain, rang undang-undang tersebut memberi perlindungan kepada penyewa hartanah komersial jika tidak dapat memenuhi obligasi kontrak akibat wabak COVID-19.

Perlindungan ini antaranya adalah seperti diusir kerana tidak membayar sewa. Walau bagaimanapun, kita akui seperti mana pandangan Yang Berhormat, rang undang-undang ini akan berkuat kuasa sehingga 31 Disember 2020. Pihak Kementerian Kewangan memohon sekiranya Yang Berhormat mempunyai pandangan yang lebih terperinci untuk disalurkan kepada Kementerian Kewangan, pihak Kementerian Kewangan akan mempertimbangkan apakah kaedah-kaedah selepas tamatnya tarikh 31 Disember 2020.

Bagi persoalan kedua yang dibangkitkan oleh Yang Berhormat, untuk makluman Yang Berhormat, dengan gelombang wabak COVID-19 yang sedang melanda, pihak kerajaan akan terus memantau perkembangan ekonomi dan mengambil langkah-langkah yang proaktif untuk mengkaji bantuan yang bersesuaian bagi membantu perniagaan yang terjejas termasuk juga pelanjutan bantuan sedia ada atau idea-idea baharu yang mungkin boleh

dimasukkan dalam pelaksanaan pihak Kementerian Kewangan dan kerajaan pada hari ini dan kita juga memohon sekiranya Yang Berhormat mempunyai cadangan, Yang Berhormat boleh salurkan kepada pihak Kementerian Kewangan.

Yang terakhir, Yang Berhormat juga bertanya adakah pihak kerajaan akan menasihati semua kerajaan negeri dan PBT bagi memberi pengecualian atau diskaun premis perniagaan di bawah pentadbirannya. Untuk makluman Yang Berhormat, dalam konteks ini, seperti mana yang telah kita nyatakan semasa Pakej Prihatin.

Kerajaan Persekutuan sentiasa membuat sesi libat urus atau sesi *engagement* dengan kerajaan-kerajaan negeri dan PBT dalam pelbagai perkara termasuk juga perkara-perkara Yang Berhormat bangkitkan ini demi memastikan kepentingan rakyat terjamin dan kepentingan rakyat yang terjejas juga dapat dibela sebaik mungkin melalui inisiatif yang diumumkan dan yang akan diumumkan dan disalurkan dengan berkesan.

Apa yang penting Yang Berhormat, segala pelaksanaan yang kita buat ini akan mengambil kira masalah rakyat yang terkesan. Sekian, terima kasih Tuan Yang di-Pertua.

Tuan Yang di-Pertua: Terima kasih Yang Berhormat. Ahli-ahli Yang Berhormat, dengan itu tamatlah sesi ucapan di bawah Usul Berkenaan Perkara Tadbir Kerajaan mengikut Peraturan Mesyuarat 17 pada hari ini. Mesyuarat Kamar Khas hari ini ditangguhkan sehingga jam 12.00 tengah hari, hari Khamis, 26 November 2020. Terima kasih.

[Kamar Khas ditangguhkan pada pukul 12.13 tengah hari]